



Iluarsaassinernut Aqutsisoqarfik  
Att.: Jonas Elgaard  
Aqqusinersuaq 14B  
3900 Nuuk

Atortut elektroniskiusut atorlugit sanatitsisumut, [joel@nanoq.gl](mailto:joel@nanoq.gl) amma siunnersortimut [ambak@ramboll.gl](mailto:ambak@ramboll.gl) nassiunneqartoq

### **Aalajangiineq: Kullorsuarmi umiarsualiviup allineqarnissaa ASN-iliornissamut pisussaataaffiunngilaq**

Allakkat ulluat: 30-05-2023  
Suliap normua.: 2023 - 7488  
Allagaatip ilisarnaataa:  
22865900

Nunalerinermut, Imminut Pilersornermut, Nukissiutinut Avatangiisinullu Naalakkersuisoqarfik (matuma kingorna 'Naalakkersuisoqarfik') 15. februaari 2023-mi Iluarsaassinernut Aqutsisoqarfimmiit (matuma kingorna 'Sanatitsisoq') Kullorsuarmi umiarsualiviup allineqarnissaanut atatillugu ASN-imut nalunaarummik tigusaqarpoq, tak. ASN-imut nalunaarummi<sup>1</sup> § 5, imm. 3.

Postboks 1614  
3900 Nuuk  
Oqarasuaat. (+299) 34 50 00  
Fax (+299) 34 54 10  
E-mail: [pan@nanoq.gl](mailto:pan@nanoq.gl)  
[www.naalakkersuisut.gl](http://www.naalakkersuisut.gl)

Naalakkersuisoqarfiup ASN-imut nalunaaruteqarnissamut najoqqutassanut oqaaseqaatai tunngavigalugit Sanatitsisup ASN-imut nalunaarummut iluarsisut, 21. marsi 2023-meersoq nassiuppa.

Naalakkersuisoqarfik naliliivoq, ASN-imut nalunaaruteqarnissamut najoqqutassat iluarsisat naammattumik suliaasut, taamaattumillu Naalakkersuisoqarfik eqqortumik tikkuussiffiusunik tunngavissaqarluni aalajangiisinnaasoq.

### **Aalajangiineq**

ASN-imut nalunaarut 21. marsi 2023-meersoq, Sanatitsisumit nassiunneqartoq tunngavigalugu Naalakkersuisoqarfik suliami imaattumik aalajangiivoq:

Umiarsualiviup allineqarnerani avatangiisinut sunniutaasinnaasut tamarmiusut, umiarsualiveqarfimmit pioreersumit piffissap ingerlanerani sunniutaanut sanilliullugit ASN-imut nalunaarummi § 8 naapertorlugu ASN-ip akuerineqarnissaanik qinnuteqarnissamut piumasaqaateqarnermik kinguneqassanngillat, sanaartugassaq piffissami sanaartorfiusumi ingerlatsiviusumilu avatangiisinut mingutsitsinernik *annertuunik* nassataqartussaannimmata. ASN-imut nalunaarummi § 5, imm. 5 naapertorlugu aalajangiineq pivoq.

### **Aalajangiinermut tunngaviusoq tunngavilersuutaasorlu**

Kullorsuarmi umiarsualiviup allineqarnerani umiarsualiveqarfiup aalajangersimasup pioreersup pituttortarfimmut, umiarsualiveqarfimmi 18

<sup>1</sup> Atortut ilaasa avatangiisinut sunniutaannik nalilersuineq aamma avatangiisinik nakkutilliinermut akiliutit pillugit Namminersorlutik Oqartussat nalunaarutaat nr. 5, 27. marsi 2013-imeersoq

meterinik avasissusilimmut inissinneqarsimasumut atasunngorlugu sananeqassaaq. Umiarsualiveqarfik atasunngortitsilluni sanasoqareerpat 150 m<sup>2</sup>-inik annertusissaaq, atasunngortitsillunilu sananerup kingorna tamarmiulluni 330 m<sup>2</sup>-inik annertussuseqalissalluni.

Allannguneq ASN-imut nalunaarummut ilanngussaq 2-mi imm. 1c<sup>2</sup>-mut ilaatinneqarpoq, taamaattumillu ASN-iliornissamut pisussaaffeqarfiunersoq misissorneqartussaalluni, tak. § 5, imm. 3. Matumani umiarsualiveqarfimmik aalajangersimasumik allannguinnissap, alliliinerup kingorna umiarsualivittut aalajangersimasutut atorineqareersutut pineqarnera tunngavilersuutigineqarpoq.

Kisiannili Naalackersuisoqarfik nalilivoq, umiarsualiveqarfimmik allannguinnissaq ASN-imut nalunaarummut ilanngussaq 1-imi imm. 16<sup>3</sup>-mut (pinngitsoorani ASN-iliortussaataaernerumut) ilaatinneqassanngitsoq, tak. § 5, imm. 2. Umiarsualivimmik allannguneq imminnermini umiarsuit tikittarfiannik, 1.3050 tonsinut killiliussanit annerusumik allannguinnermik kinguneqartussaangilaq, tak. ASN-imut nalunaarummut ilanngussaq 1-imi imm. 9<sup>4</sup>.

Piffissami sanaartorfiusumi avatangiisit, imartamilu avatangiisit ilanngullugit nipiliornermit sunnerneqassapput, umiarsualiviup allissutissaata toqqaviliornerani immap iluani qaartiterisoqartartussaammat.

Kisiannili ASN-imik nalunaaruteqarnissamut najoqqutassani allassimavoq, immap iluani qaartitsinissamut atatillugu tamatumalu nalaani immap naqqaniit saaguusanngorlugit puasartitsinerit siuleriit atorlugit, aammalu immami isit atorlugit avatangiisinik nakkutilliilluni pinaveersaartitsissutaasussanik iliuseqartoqassasoq.

Isit atorlugit nakkutilliinnermi qaartitsinissaq sioqqullugu immami uumasunik miluumasunik takusaqartoqarsimappat qaartitsinninnissaq qulakkeerneqartassaaq. Tamatuma peqatigisaanik immap naqqaniit saaguusanngorlugit siuleriinnik puasartitsinerit nipiliorfimmii 1000 meteriniit nipiliornerup annikillisinneqangaatsiarnissanut qulakkeereqataassapput. Tamanna tunngavigalugu Naalackersuisoqarfik nalilivoq, immap iluani qaartitsinermut atatillugu nipiliornerup immami avatangiisinut sunniutigisinnaasaat annertussanngitsut.

Piffissami ingerlatsiviusumi umiarsualiviup allissutaa avatangiisit annertuumik mingutsinneqarnerinik kinguneqassanngilaq, umiarsualiviup allissutaa

---

<sup>2</sup> ASN-imut nalunaarummut ilanngussaq 2-mi imm. 1c: "Umiarsualiviit aalajangersimasut".

<sup>3</sup> ASN-imut nalunaarummut ilanngussaq 1-imi imm. 16: "Ilanngussami matumani allanneqarsimasunik pilersaarutininik allannguinnerit allilerinerilluunniit tamarmik, taamatut allannguneq allilerinerluunniit ilanngussami matumani aalajangersarneqarsimasut killiliussanik naammassinnittut".

<sup>4</sup> ASN-imut nalunaarummut ilanngussaq 1-imi imm. 9: "Imaatigut niuernermini umiarsualiviit kiisalu nunap iluani umiartornermut umiarsualiviit, umiarsuarnit 1.350 tonsit sinnerlugit angissusilinnit tulaffigineqarsinnaasut".

umiarsualivimmik atueriaatsimik allangortitsissanngimmat, imaluunniit angallannerup annertusingaatsiarneranik kinguneqassanngimmat.

Tassalu Naalackersuisoqarfik ataatsimut naliliivoq, ASN-imut nalunaaruteqarnissamut najoqqutassani paasissutissat tunngavigalugit suliassami assersuutigalugu immami avatangiisit, nunami avatangiisit, pinngortitami pissutsit, mernguersarnissamut atugassarititaasut avatangiisilluunniit allat, avatangiisit immikkoortut ataasiakkaat tamarmiusulluunniit *annertuumik* sunnerneqassanngitsut. Taamaattumik avatangiisinut maleruagassat tamarmiusut<sup>5</sup> avatangiisini pissutsinut, suliassami kalluarneqartussanut maleruagassiuussinissamut naammassasut Naalackersuisoqarfimmiit isumaqarfigineqarpoq.

Tassalu matuma siuliani allassimasut tunngavigalugit sanaartugassaq ASN-iliornissamut pisussaaffeqarfiunngilaq, taamaattumillu sanatitsisoq ASN-imut akuersissummik qinnuteqassanngilaq.

## **Ilanngussaq 2 naapertorlugu suliat ataatsimut isigalugit**

*Umiarsualiviit aalajangersimasut* ASN-imut nalunaarummut ilanngussaq 2-mi imm. 1c-p ataani allattorsimapput. Sanaartukkanik nutaanik sanasoqannginnerani imaluunniit sanaartukkanik pioreersunik, ASN-imut nalunaarummut ilanngussaq 2-p ataani allassimasunik alliliisoqannginnerani allannguisoqannginneraniluunniit ASN-imut nalunaarummi § 5, imm. 3 naapertorlugu Sanatitsisoq allakkatigut nalunaarummik Naalackersuisoqarfimmut tunniussisussaavoq.

Sanaartukkap avatangiisinut sunniutigisinnaasaat eqqortumik naliliiffiginiarlugit nalunaarut paasissutissanik, ASN-imut nalunaarummi § 5, imm. 4-mi allassimasunik imaqassaaq. Suliami aalajangersimasumi matumani Naalackersuisoqarfik naliliivoq, nalunaarummi iluarsisami 21. marsi 2023-meersumi § 5, imm. 4 naapertorlugu piumasaqaat naammassineqartoq.

Tunngaviusumik sanaartugassaq, ASN-imut nalunaarummut ilanngussaq 2-mi allassimasoq taamaallaat ASN-iliornissamut pisussaataffaiffussaaq, inissisimaffissaq aalajangersimasoq avatangiisinut naleqqiulluni avatangiisinut annertuumik sunniuteqarsinnaappat, imaluunniit mianersornissamut tunngaveqarluni sanaartugassap avatangiisinut annertuumik sunniuteqarsinnaanera nalornissutigineqangaatsiarpat.

Suliassamik ilanngussaq 2-mi allassimasumik avatangiisinut sunniutissatut naatsorsuutigineqartunik taamatut naliliinermi, pisuni ataasiakkaani paasissutissat, sanaartugassamut ASN-imut nalunaarutini ataasiakkaani allassimasut malillugit avatangiisinik misissuinerit aalajangersimasut apeqqutaassapput.

---

<sup>5</sup> *Avatangiisit innarlitsaaliorneqarnissaanik Inatsisartut inatsisaat nr. 9, 22. november 2011-meersoq*, kiisalu taanna tunngavigalugu nalunaarusiasat.

### **Akuersissutit akuersissuteqartarnerillu allat**

Sanatitsisup sukkulluunniit akuersissutinik immikkullu ittumik akuersissutinik pisariaqartunik, aamma akuersissutaasinnaasunik immikkullu ittumik akuersissutaasinnaasunik aalajangiinermi matumani allassimanngitsunik pissarsiniarnissaq akisussaaffigaa.

### **Maalaaruteqarnissamut ilitsersuut**

Aalajangiineq manna Avatangiisinik innarlitsaaliuinermit inatsimmi § 60<sup>6</sup> naapertorlugu Avatangiisinik Innarlitsaaliuineq pillugu Maalaaruteqartarfimmut, Naalakkersuisunit pilersinneqarsimasumut maalaarutigineqarsinnaavoq.

Piffissaq maalaaruteqarfiususaaq aalajangiinerup Avatangiisinik innarlitsaaliuinermit inatsimmi § 60 naapertorlugu nalunaarutigineqarneraniit naatsorsorlugu sapaatit akunnerinik arfinilinnik sivissussuseqarpoq.

Maalaarutaasinnaasut uunga nassiunneqassapput:

Namminersorlutik Oqartussat

Nunalerinermut, Imminut Pilersornermut, Nukissiutinut Avatangiisinullu


Naalakkersuisoqarfik

Postboks 1614

3900 Nuuk

Tamatuma kingorna maalaarut, najoqqutassanik, suliap naliliiffiginissaanut ilaatinneqartunik ilaqartillugu Avatangiisinik Innarlitsaaliuineq pillugu Maalaaruteqartarfimmut nassiunneqassaaq. Tamatuma peqatigisaanik suliami akuusut suliami maalaarummik tigusaqartoqarsimanera pillugu ilisimatinneqassapput.

Inussiarnersumik inuulluaqqusillunga



Natuk Lund Olsen

Naalakkersuisoqarfimmi pisortaaneq

Nunalerinermut, Imminut Pilersornermut, Nukissiutinut Avatangiisinullu

Naalakkersuisoqarfik

---

<sup>6</sup> Avatangiisit innarlitsaaliorneqarnissaanik Inatsisartut inatsisaat nr. 9, 22. november 2011-imeersoq.